

33% Calon Parlimen, 49% DUN Muka Baru – Najib
mStarOnline
15 April, 2013
Oleh NURUL AIN MOHD HUSSAIN

KUALA LUMPUR: Barisan Nasional (BN) menampilkan 33% muka baru di kerusi Parlimen manakala 49% di peringkat Dewan Undangan Negeri (DUN) pada Pilihan Raya Umum Ke-13 (PRU-13).

Pengerusi BN, Datuk Seri Najib Tun Razak berkata calon yang tersenarai adalah mereka yang dapat memenuhi akujanji yang terdapat dalam manifesto BN.

"Senarai calon BN ini pada hemat saya adalah barisan terbaik yang mampu kita sediakan untuk memenuhi kehendak dan aspirasi rakyat.

"Pemilihan calon kali ini telah melalui proses yang panjang kerana banyak rundingan dengan parti komponen dan pengerusi BN negeri," katanya pada sidang media selepas menyampaikan watakah dan senarai calon kepada pemimpin parti komponen BN dan Pengerusi Badan Perhubungan Negeri di Menara Dato Onn di sini pada Isnin.

Beliau berkata mengikut jadual senarai calon parti komponen BN akan diumumkan oleh pimpinan masing-masing pada Isnin atau Selasa.

Sementara itu, menurut Najib, calon Umno akan dirangkum dan diumumkan secara serentak oleh Pengerusi BN negeri masing-masing.

Sebanyak 727 kerusi dipertandingkan pada PRU-13 dengan 222 kerusi Parlimen dan 505 kerusi DUN.

Mengulas lanjut Najib yang juga Presiden Umno berkata pemilihan barisan calon kali ini dibuat dengan mengambil kira sentimen dan aspirasi pengundi.

"Kita ambil kira sentimen dan jangkaan pengundi untuk lihat perubahan dalam BN.

"Kita juga melihat perlunya wakil-wakil rakyat sedia ada terdiri daripada mereka yang berpengalaman berkhidmat dalam kerajaan atau wakil rakyat. Imbangan antara muka-muka baru adalah sangat penting " katanya.

Jelas Najib, pembaharuan bukan sahaja dari segi calon tetapi juga mereka yang boleh memenuhi keperluan rakyat.

"Bukan sahaja perlu tampilkan pembaharuan. Sebagai parti dengan mandat baru dengan kerajaan akan datang. Kita perlu mereka yang mampu mentadbir kerajaan dan berkhidmat kepada rakyat.

"Jika semua muka baru akan membantut kemampuan kerajaan BN untuk memenuhi harapan rakyat. Saya harap penilaian dilihat dalam konteks menyeluruh. Bukan sahaja mereka yang bertanding...kemampuan untuk menubuhkan kerajaan yang kuat dan mampu penuhi kehendak rakyat pada masa akan datang," katanya.

Perdana Menteri turut mengingatkan mereka yang terpilih melakukan terbaik untuk parti.

"Ada kelemahan parti akan bertindak baiki. Pada yang tidak terbaris, bukan bererti mereka gagal, bermasalah atau ada kepincangan. Tetapi dalam keadaan masyarakat dan pengundi menuntut perubahan maka sebahagian anggota kita terpaksa beri laluan untuk pembaharuan," katanya.

Najib turut mengucapkan terima kasih kepada semua wakil rakyatnya yang telah memberikan khidmat sepanjang penggal ini dan berharap terus mendapat sokongan kuat daripada anggota parti.

Beliau ketika ditanya, apakah kriteria calon untuk kerusi-kerusi panas yang ditandingi pembangkang seperti Pematang Pauh.

Najib berkata, pihaknya ada calon yang hebat untuk menandingi ketua pembangkang itu.

"Tidak mungkin kita boleh menang semua kerusi itu realistik, tetapi kita meletakkan calon berwibawa," katanya.

Hakcipta Terpelihara © 1995-2013 Star Publications (Malaysia) Bhd

Source:

http://mstar.com.my/berita/cerita.asp?file=/2013/4/15/mstar_berita/20130415140423&sec=mstar_berita